

## 200 Jahre Sportschützen Gais

Gschätzte President, liebe Fredy

ond Schötze vo Gääs, sehr vereehrti Gäscht, gschätzti Schötzegmäänd, Es ischt nüd alltäglich das mer anere jubilierende Sektion tar zom 200-jöhrige Bestooh gratuliere.

Als Erschts töörfi Eu im Name vom Kantonalvorstand d'Grüess ond Glöckwünsch vom Kantonschötzeverein Appezell-Osserrhode überbringe

Denn no wettis nüd onderloh, eh paar Wort a Sie z'richte.

Mit de im Jahr 1808 erfolgte Vereinsgründig isch fangt d'Gschicht vo de Feld-ond - oder Standschötze Gääs aah. Ii de Statute isch denn folgendes nieder gschrebe:

De Zweck vom Verein söll eh fründschafftliche Vereinigung hiesiger Schötze zor Hebig ond Förderig vom Schötzewese, sowie zor Belebig vaterländischer Gsiinnig see.

1870 isch denn de Zämeschluss vo de Stand – ond de Feldschötzegeellschaft zo de Schötzegeellschaft Gääs ,Tatsache worde. Vom 6. bis 9.Juni 1892 isch z'Gääs bii aahfänglichem Storm ond Rege s' Kantonschötzevescht döörre gfuehrt worde. Bereits do het mer off 10 Schiibe d'Wettkämpf döörre gfuehrt. Es hei sich denn eh Defizit vo Fr.79.21.- ergee!!

Eh Jahr spööter (1893) isch denn de Biitrett zom Kantonschötzeverein Appezell-Osserrhode beschlosse worde.

Bereits 1905 send Kürs im Armbruschtsschüsse för jungi Schötze döörre gfuehrt worde. Diie send denn 1923 vo de eigentliche Jungschötzekürs abgelöst worde.

Im Mai 1921 hett de Gmändroot Gääs amene KV über Fr.48'000.- zor Erstellig vonere ziitgemässe Schüüss – Alag i de Bronnenau, zuegstimmt.

D' Fusion vo de Schötzegeellschaft Gääs ond de Militärschötze erfolgt im Jahr 1938 zo de Feldschötzegeellschaft.

Mit de Abgoobe vo Gratismunition, emene Biitrag vom Bund ond em Schwizerische Schötzeverein , send d'Jungschötzekürs ab em Jahr 1937 onderstützt worde.

Im Jahr 1950 ischt eh Standweihschüsse döörre gfuehrt worde noch umfangriiche Renovationsäerbete ond de Installation vonere neue Signalaalage (Vorgäänger vo de hütige Trefferzeigeaalage).Dä Aalass isch zo volle Z'fredeheit vo de Schötze velaufe, ischt aber au en Erfolg worde ii finanzieller Heesicht.

Als Ondersektion ischt im 1956 eh selbständegi Pischtolesektion als Ondersektion vo de Feldschötzegeellschaft gründet worde.

Ab em Johr 1964 ischt d' Uusbildig vo de Jungschötze no no am Stormgwehr 57 erfolgt.

Ganz gwöss markiert de Karl Fitzi en Höhepunkt i de Vereinsgschiicht. Mit gwössehaftem Training het er sich en Platz i de Schiizerische Matchgruppe erkämpft. Er het den tööre a de Weltmeisterschaft z' Wiesbade (DE) tööre täälneh. Mit em Gwönn vo de Broncedaille im Stutzer-Dreistelligsmatch i de Mannschaftsmeischterschaft het de Karl Fitzi ganz bestimmt Gschiicht gschrebe.

Zom 175 Jöhrige Bestoh het sich de Verein 1983 de libau vo de elektronische Trefferzeigeaalag g'leichtet.

Im Joohr 2004 schlüüset sich die drüü Abtäälige 300m, 50m, 10m zo äm Verein zäme, nämmlig zo de Sportschötze Gääs.

Mit dem wegweisende Schrett isch Zuekunft för's sportlich Schüsse z'Gääs iiglüütet worde.

Sandra Moshin-Höhener bestritt 2006 mit der Juniorinnen-Nationalmannschft die Europameisterschaft Luftgewehr 10m in Moskau. Das Erfolge Mitgliederzuwachs bedüütet ischt eh alti Sach. Wa aber set de Erfolge vo de Sandra, im Verein passiert, isch Weg wiisend för d' Zuekunft vo de Schötzeverein oder ebe gsääht vo de Sportschötze-Verein.

Das hender dene Erfolge au herts Training stoht, söt jo enard klar see. Aber bis da Omfeld Trainer, Trainingsplanig, Wettkämpf, Transport ond wa sös no alls dezue ghöört stoht, bruuchts Lüüt wo mit Herzbluet för die Sach iistönd. Do dezue bruuchts en innovative, wiitsichtige Präsident mit emene entsprechend zuekunftsgrichtete Vorstand, de nöötige Trainer ond de notwendige Infrastruktur.

Ich möchte a derre Stell em Präsident Fredy Langenauer ond össem Ehremitglied vom KSV AR em Werner Höhener ganz herzlich danke för die vorzüüglich Nochwuchsärbet wo Sie i erem Verein leischtit.

Wenn ii allne Sektione im Kanton eh so ziilgrichtet gschaffet wör, mösti sich de Kantonalverband kää Gedanke öber d'Zuekunft vom Schüssweise im Kanton mache.

I wünsche Eu för di wiiteri Zuekunft mit de Sportschötze Gääs viil Erfolg ond wiiterhin guet Schoss.

Euer Kantonalpräsident

Bruno Preisig